



QVÆSTIO MEDICA

Cardinalitiis disputationibus manè discutienda in
Scholis Medicorum die Iovis 18. Martij.

M. DIONYSIO DODART, Doctore Medico, Præside.

Sunt ne Carnes quovis alio cibo salubriores?

I.

CIBUS homini petitur aut ex his quæ terra suppeditat, aut ex animalibus. Utrinque, salubris. Horum fere nulli pepercit aut gula, aut necessitas, aut male sana quilibet experiendi libido. Petita sunt vel è carduis deliciæ, atque ex ipsis cochleis, terebinibibus, viperis. Norvegi ex cortice abietis; Orbis novi incolæ vel ex radice venenatâ panem extundunt, nec minus valent. Accessit & consuetudo quâ nihil tam est fœdum & intolerabile, quin quâdam animi inductione fiat voluptarium. Ita nobis verminantes aut sane inveterati casei, iis ipsis movent salivam quos idem odor in aliis rebus graviter offendit; veteribus garum, liquamen putridorum piscis intestinorum, atque etiam nunc Hispanis coriandri recens herba, cimicibus olentior, & allium placet. Indis, ipso allio gravior aza fœtida cibus deorum habetur; Sinenſibus & Americanis septentrionalibus, frumenti farina putridissima quovis oleo olidior in deliciis est. Tartari septentrionales oleum ex balanâ petiunt, Æthiopes sponte mortuarum vaccarum intestina cruda nec purgata liguriunt; quin & ipsa vaccarum stercorea magnatibus pro embammate. Denique ipsa rerum humanarum vicissitudo quædam addidit, plura antiquavit: ut cum multa in deliciis fuissent, etiam in fastidium venerint. Ita aselli, hinnuli, vulpes, qui ab Hippocrate ad Galeni tempora etiam à lautis admissi sunt, catelli convalescentium solatia, glires lautissimorum Romanorum deliciæ: nunc miserrimæ tantum famis subsidia. Pisces olim apud Romanos, Græcosque jucundissimus & quotidianus & salubris cibus divitum & urbanorum, hoc est otiosorum: nunc à lautioribus mensis plerumque, maxime quadragesimalibus feriis, exulant ad cœnobîa pauperumque casas. Apud

A



2

Romanos, Græcosque veteres quotidie semel tantum edere, idque vesperi, promiscuum; certe qui prandebant, pauxillum aliquid gustabant; aliis abunde fuit toto die jejunos cœnare, nec ad saturitatem: nobis vix sufficit quotidie bis impleri & à paulo plus trecentis annis, pro jejuniis arctò habetur quæ fuit olim Græcorum, Romanorumque ingenuorum vita communis. Quin & tota vivendi ratio iisdem in regionibus ævorum lapsa in contrarium mutata est. Syri Cypriique cujuslibet carnis abstinentissimi ad Pygmalionis ætatem; inde ultra Menandri comici tempora saltem piscibus in totum abstinerunt; abstinebant & Græci heroicis temporibus, tunc carnis edacissimi: nunc Syri, Græci, uno verbo Orientales permulti vice versa carnes prope fastidiunt, indulgent piscibus. Germanis & Gal-
lis olim vita abstemia, & vinum eo nomine invisum quod corporis vires frangeret: nunc vino, vel vinosis liquoribus carere non possunt. Contra in oppositis regionibus eadem vivendi ratio. Groënlandi pariter & Æthiopes carnibus crudis vescuntur. Ut olim Ægyptij panibus in annum coctis, Ichthyophagi piscibus ad solem siccatis vivebant, ita nunc Lapones, Norvegi &c. Quin & cum aliud atque aliud diversis in locis natura flagitet, contraria his ipsis invalere; itaut frigido cœlo plus bibatur ubi minus sititur; torrido, calida calentiaque expetantur. Ita bibacissimi hominum Sarmatæ, Æthiopes piperis ad luxum voraces, Sineses fervidum potant. Adeo quisque suo more sanus vivit. Cave tamen omnia perinde habeas. Quibusdam legibus constat ciborum delectus, ut non tantum aliis alio præstantior sit, quadrupes quadrupede, piscis pisce, avis ave: sed & genus generi præster; non tantum habitâ ratione ad singulos, sed ad regiones, tempora, status, instituta. Ita nationibus ad utrumque mundi cardinem sitis, quibus nulli sunt fructus, nullæ fruges, animalium carnes magis conveniunt; minus, his gentibus quæ Zonam torridam colunt, quibus commodiora quæ è terrâ prodeunt; Zonarum temperatarum incolæ utroque genere commode utuntur. Ita quadrupedes, aves, hyeme magis quam æstate conveniunt; ver pisces commodissime tolerat; ægris plerisque infirmissima materia; convalescentibus, sedentariisque media; rusticis & omnibus qui vehementissime exercentur firmissima in uno quoque genere materia experenda. Cuivis nationi, tempori, naturæ, statui, instituto, cibi genus quod terra fundit unum absque aliis omnibus aliunde petitis aut cibis aut condimentis abunde sufficit.

I I.

ELIGENDI cibi lex summa, non ratio quædam artificiosa ex philosophorum opinionibus longe petita. Quippe nec corporum alendorum nec alimentorum intimam structuram aut fermentorum conditiones aut norunt aut nosse possunt. Lex prima, instinctus quidam, etiam in homine cæcus, qui in rerum Conditore, summa ratio, & perpetua. Quamquam bruta nonnunquam aberrant; tanto sæpius homo, quanto plus institutione, arte, animi inductione, perturbationibusque & imaginibus, quam naturâ regitur; quo fit ut sæpe jucundius eligat, non melius; quod jucundum qui-

dem esurienti sit necesse est, sed non ita ut vel plenum incitet. Igitur usus accedat necesse est, lex summa, quæ instinctum regat, emendet & redigat ad naturam. Quicquid aut opinio præjudicata garriat, aut suadeat voluptas, nihil ratum habeas nisi quod experimenta docuerint; inter quæ maxima fides habenda his quæ plurima & vetustissima & frequentissima sunt & latissime patent; ut tanto certior & magis cognita sit cæteris Medicinæ partibus ea quæ victus ratione constat, maxime quæ regit secundam valetudinem, quanto communior morbo secunda valetudo, alimenta remediis frequentiora, natura medicinâ antiquior. Has leges aliquantum in Homine perturbat consuetudo, quâ fit non tantum ut etiam ingrata naturæ tantò difficilior omittantur; sed etiam ut per se jucunda, fastidiantur; pessima minus noceant; optima insolita minus profint, obfint aliquando. Sed dum in melius ea sensim mutatur, vix unquam non succedit mutatio. Vis scire quid cuique brutorum maxime conveniat, animadvertite quid lubentissimè vescatur. Nonnunquam fallit hoc indicium. Equi, nulla fraude adhibita, tritico, quod avidissime vorant, rumpuntur. Sed per raro fallit. Sua Homini natura longe ignotior; adeò ut instinctum suum, sua bona non nisi ratione jam non dignoscat; non eâ quæ petitur, ex rerum principii sed eâ quæ sensus communis dicitur.

III.

QUEM AD MODUM unicuique animalium generi suum penus proprium est unde vivat: ita propria officina alimenti proprii conficiendi, viscerum, imprimis ventriculi, propria structura, & certa alimenti dividendi instrumenta, omnibus oris partes, nonnullis etiam ungues. Itaque ex earum partium figurâ quid genus maxime conveniat certo cognoscitur. Quæ tam manifesto occulti Numinis est composita consilio ut, si cætera flectant, Deum hæc fateantur, & quasi digito demonstrent. Ita si avis, aut piscis, aut quadrupes animal, etiam mortuum & ignotum, vis scire quò cibi genere commodissime victurum fuerit, quo similia sint alenda: partes eas considera quæ ad alimenta dividenda, conficienda pertinent. Rostrium igitur & ungues avium aspice. Quæ partes, si acutæ, aduncæ, durissimæ fuerint, scito præda victum quæsiisse & ventriculum membranaceum habere; si acutæ, duræ nec aduncæ, ad carpenda morticina comparatas; si minus firmo & recto acumine sed ita ut rostri latera tenuissimâ acie sint, seminibus, frugibus, que enucleandis. Si quadrupes aut piscis, dentes considera. Acuti & vicissim spatia alterna subeuntes, ad lanienam factum demonstrant; plani, quales bovi, scaro, rebus è terra natis vivere solitum; cui nulli sunt incisori pabulatione vixisse manifestum; inferiori tantum maxillâ dentatum, ad ruminandum factum fuisse & multiplicis ventriculi, qui ejusdem pabuli indicium; cui incisori sunt dentes ut sciuro, herinaceo, lepori, id aut fructibus victitavit aut virgultis. Non quod non & aliis nonnulla etiam incisori salubriter uti possint alimentis; nam & canes ad lanienam & carnificinam nati, pane utunque victitant; & mures atque sorices deficientem prædâ quam vel ex propriâ fatura capiunt, quolibet obvio latrantem stoma-

4.
elium implent, sed quod ea sint magis conducibilia, ad quæ conficienda oris & ventriculi structura videtur comparata. Idem esto de homine iudicium. Qui, quamvis omni ciborum genere vivat & valeat, tamen eâ est oris structurâ quæ cum fructibus findendis, molendis, in aliis animalibus sit addicta, ostendit fructus humanum esse cibum, eumque naturalem, quippe arte nullâ, nullo labore paratum, nullis egentem condimentis. At fruges, arte quæsitum alimentum, licet eventu percommodum, tamen non usque adeo naturale esse, suadet eadem structura, impar conficiendis commodè frugibus, quæ molendæ, purgandæ, pinsendæ, fermentandæ; coquendæ, inagnâ & longâ arte & multis ab Orbe condito seculis inventâ. Utrumque genus tam usu comprobatum, ut à primis rerum initiis ad hæc usque tempora Orbe toto claruerit; tam gratum, illud præsertim quod pertinet ad panificia, ut cum vix alius sit cibus quem diu ventriculus exoptet, ille raro fastidiatur, atque in aliorum continuâ vicissitudine semper retineatur, ita tamen ut eo vix quisquam se ingurgitet.

I V.

FRUCTUUM alij succo liquido prægnant, ut vux nostræ, cerasæ; alij pulpâ humidâ constant, ut poma; alij quasi farinâ quadam compacta sunt, ut nuces omnis generis, castanæ; cui generi accedunt frumenta & legumina. Quidni & fructibus addas olera quæ & ipsa alimenta sunt & alimentorum condimenta. Horum omnium neque singula omnibus, neque omnia ulli conveniunt. Sed vix ulla est natura quæ, delectu quodam habito, in his omnia non reperiatur, non tantum ad vitam necessaria, sed etiam ad sanitatem roburque & molem corporis; atque adeo ad voluptatem, etiam Epicuream, cujus finis, valere nec dolere. Itaque solus hic cibus homines pavit à primis rerum initiis ad diluviû; hoc Persarum gens bellicosissima & robustissima per diu vixit, pane solo contenta cum nasturtio & sale & aquâ, tum, cum universam Asiam domuit; hoc solo ab annis plus bis mille utitur media pars Indorum, Brachmanum Banearumque numerosissimæ familiæ, quibuslibet ærumnis laboribusque pares. Hic cibus fere solus, certe præcipuus, strenuissimas Romanorum, Carthaginensium gentes in castris, pane extemporario & subcinericio, immensis exercitiorum, operum laboribus superiores reddidit, aquâ solâ vel postea potos; ita non injucundus, ut & ipsis Imperatoribus non paucis satisfecerit. Hoc ad olympiadem sexagesimam sibi pondus nervosque fecerunt athletæ graves. Hoc contentus Epicurus solâ mazâ & aquâ se beatum prædicabat. Temperatis, intemperatis naturis æque convenit. Optimi fructuum dulces. Cæteri, non tantum alimenta, sed condimenta, medicamenta; in quibus vinum, perpauca vel ad sanitatem necessarium, vel ad robur, utile, nisi assuetis; nocivum vel eo ipso quod, etiam sobrios, sibi faciat obnoxios. Dulces fructus, ac summorum saporum expertes, omnibus naturis utiles, præsertim autem optime comparatis. At intemperatis cujusvis modi sint, sua cuique in fructibus frugibusque opposita & utilis materia, Humidi siccioribus naturis, ut biliosis, melancholicis opportuni, his denique quos du-

rior alius male habet; modo qui succo diffiluunt ad effervescendum prompto, copioso aquæ potu diluantur. Sicci humidiores naturas recreant, & quos exercet citior alvus. Qui sunt succi tennis & condimentis acrioribus aut amariusculis attenuati, conveniunt somnolentis & sanguine crassiori gravatis. Crassi, lenti, mobiliiores naturas, & perpetuo quodam sanguinis aestu percitas sedant. Quin & obesiorum corporum extenuandorum & tenuium saginandorum ars, tantopere, tantoque successu veteribus exculta, idoneam in his materiam reperit, quâ fructibus humidioribus esurientem ventriculum fallentibus reliquo corpori alimentum exiguum & dissipabile subministrantibus; quâ coliphiis & ptisanis frumentaceis, pulte, Romanis olim Pœnisque admodum familiari, caticis, caseo molli, exigua mole multumimenti fundentibus, quod facile non evanescat. Inde pugiles ante Pythagoram gymnastem, qui primus carnes addidit, se ingurgitando non tantum suspectam molem, sed & robur in immensum augebant. Sed cum nullus cibus sit qui, dum nimius sumitur, minus noceat, robustis, qui duriter exercentur, nullus modicus, magis sufficit in longissimas inædias, quales etiam nunc Orientales quadragesimalibus feriis tolerant, sicco frigidoque victu, olei vini que experte. Vis faciles concocto cibos & ventriculo etiam debili leves? Non tantum panis spumeus & recens subministrabit; sed & ptisanæ ex hordeo, orizâ, avenâ, paratæ. Esuris? Nihil est quod alia desideres. Tædium te tenet? Ecce tibi immensam varietatem ferculorum; pomorum, pyrorum, prunorum, persicorum, longe plura nobis cognita genera quam veteribus. Ipsa tempestatum varieras tædium antevertit, jucundissimis optimisque fructibus. Ver fraga suppeditat, tum mora rubi idæi, odore solo pretiosa, mala armeniaca, quæ fructuum conditorum coryphæi; Æstas pyra rufilla, persica, nusquam, ne apud Persas quidem venena, ubique mira jucunditate saluberrima; Autumnus pyra butyrofa, viridia oblonga, falerna seu bergamotiana, & quæ in multam durant Hyemem, virgulesiana, bruta-bona, ambaretta; & quæ circulum anni conficiunt, pompeiana, poma reginetta. Jani si fastidium urget, quod sæpe carnes edentibus obrepit, & saturis, secundarum mensarum usu, alioqui præpostero, corrigitur, nihil est quod alia desideres. Ex ipso eo genere condimenta suppetunt; innocentes cupediæ, sine quibus, ne ipsæ quidem carnes sapiunt. Ubique obviæ, cum nasturtium & acidulæ herbæ fere nusquam non proveniant, sed in Zona torrida optimæ; inter quas saccharum ipso melle jucundius, nec minus salubre, veteribus cognitum. Otiosis sua est in pane ex loto vel dilutiori polline parato, & diligenter sive per molam acefcentem, sive per zythi spumam fermentato, tenuis & parabilis annona. Philosophis & naturæ, mathematicum, rerum æternarum meditationi adiectis pura inde diæta neque caput petere, neque alvum distendere obnoxia, Ægyptiorum Sacerdotes, Magorumque apud Persas tertiam partem aluit, & litteratissimam Phœnicum nationem universam, artium, scientiarumque parentes, Pythagoræ magistros, à quò Græca omnis Philosophia orta est. Itaque idem cibus Pythagoricæ, nationi verius quam sectæ per

multa sæcula sufficit & innumeris Essentorum, Therapeutarum, Anachoretarum, Cærobitarumque Egyptiorum, Arianorum myriadibus, parum & semel in die sub vespetum sumere solitis, & vitam exercitam, sed vegetam & hilarem in longum ævum producentibus. Rusticis nostris & triremium remigibus panis cibarius cum paucis leguminibus sufficit in quolibet labores. Placet peregrinatio, vel sedentaria vita? Ubique fere invenitur tantum fructuum frugumque unde facile toleretur. Denique cum nihil æque servare possit sanum ac animi tranquillitas, nihil æque labefaciat ac anxietas, quæ plerisque plurima in quærendis cibis succrescit: quid pane fructibusque vilis? Ut vere una hæc sit ars innocentissima, Homines mediocri in re, sine labore locupletandi, & simplex victus non corporis tantum, sed etiam animi vera sit Medicina.

V.

ERG O cibus ex animalibus petitus non utique exoptandus, si lac; oua, butyrum, mel excipias; animalium fructus & quasi spontaneum vestigal. Lac, Anglorum, Germanorumque & Sarmatarum, animosissimarum nationum, perpetuus quondam cibus, abstemiis optimum alimentum; in puris visceribus, purgationem non exigit; cum fructibus siccis eximie concordat, nec repugnat humidis si acidis excipias; nec calculo facit obnoxios; & prope solum apud veteres novosque morborum articularium remedium. Oua sorbilia, non biliosa ut finxit posterior ætas; febrientium ferculum non reiiciendum si potu includatur; veteribus, infrequentius. Butyrum, mel condimenta; plerumque innoxia. Quæ trucidatis animalibus extorquentur, nec ita utilia, & suspecta. Sanguis, adeps, stomacho gravis. Carnes commodiores, non ita tamen ut cum fructibus frugibusque æquo conferri queant, quarum accessiones & condimenta; in tantum supervacua ut carnes solas vesci homines vix ferant, & qui fruges non habent, ut qui sub polo sunt, piscibus siccis pro pane cum venatione utantur, Antillarum autem incolæ panem in veneno quærere ausi fuerint potius, quam solo venatu piscatuvæ vivere. Pisces, an aves, an quadrupedes, parum aut nihil refert. Avibus respondent pisces saxatiles & pelagij, & fluviatiles carne sticis respondent cetacei minores. Imo quibusdam naturis pisces magis conveniunt, ut iis quas atra bilis male habet, & quibus aliud biliosa aut corruptior, corpus plenius & grave, quo in numero divites & urbani plerique sunt. Aliis perpartis nocent, maxime si condimentorum delectus habeatur; & febrientibus commodiores sunt, adeo ut in acutis morbis, ut pleuritide concessi, & in longis, ut cancro, morbis comitialibus, spū sanguinis, tabe, & convalescentibus præscripi sint à Veteribus. Quos ad exquisitam veri normam exigere, adeoque, verecunde & caute emendare quidem aliquando licet, sed in eo præstaret imitari, ut in multis quæ posteriorum negligentia obsoleverunt, quam illos vetustatis contemptu indigne suggillare, vel odio novitatis, tanta religione colere, ut aut quæ ignoraverint, hoc ipso, futilia; aut vera omnia, quæ docuerint, eodem

jure existimentur. Quadrupedum autem volatiliumque carnes minus aptæ sunt calidioribus naturis, & febrientibus, hoc est maximæ parti sanorum, ægrotum. Quamobrem antiquatus ptisanarum & piscium usus, causarii, ægris, & cōvalescentibus iis qui sorbitionibus ali solent, revocandus videtur, aut potius aliquanto melior & incorruptior ptisana ex oryzâ, saccharo modico & aliquot piperis albigranis integris condita, nunc Persis & Indis febrientibus tam salutaris quam familiaris; vel saltem, Lusitanorum Italorumque ritu, in belle coctis, sed dilutissimis jusculis ex pullo gallinaceo paratis, intritâ micâ panis; quæ omnia multò præstant sorbitionibus, quadrupedum aviumque succo prægnantibus & plane liquidis; cum etiam sanis molliuscule valetudinem suam curantibus concoctu difficiliores sint, febrientibus autem ventris illuviem augeant, iis præsertim quibus scetidior & fusior est alvus. Nec quis credat carne carnem alendam, cum tauros herba recens, sicca, opimos robustissimosque faciat, & equos, animal ad onera præliaque natum, paleis habitissimos fieri constet. Neque consuetudine, etiam à parentibus ductâ, naturam ita fieri putes, ut qui avis carnivoris ortus fuerit, huic necessitas incumbat aliqua eisdem cibis serviendi: cum nec propriâ quidem consuetudine quis ita mancipetur, quin sæpe etiam delicatissimæ morbosæque naturæ, simul ac in cœnobis migraverint & abstinentiæ se se tradiderint, quasi miraculo confirmatæ visæ fuerint; & homines opulentissimi arthritici, nec quadragesimales epulas quotidianis conviviis ferentes & piscibus exprobrantes cupediarum vitia, fortunis exuti, sicco victu convaluerint; & qui marcebat doloribus, insomniis, imbecillitate stomachi, aut lacte & pane, aut ipsamet xerophagiâ, non liberatus tantum, sed saginatus etiam, non unus visus sit. Adeo & lubentibus, fere omnia sana; & dura necessitas naturæ nonnunquam propitia; & quæ putantur etiam sanos affligere, ea vel causarios, imo ægros ipsos sæpe recreant.

Non ergò Carnes quolibet alio cibo salubriores.

Afferebat JACOBUS DESPREZ, Parisinus.
A. R. S. H. MDCLXXVII.

PARISIIS,
Apud Franciscum Muguet, Regis & Illustrissimi Archiepiscopi
Parisiensis Typographum.